

四庫全書

史部

欽定四庫全書

華陽國志卷十上

晉 常璩 撰

先賢士女摠讚論

含和誕氣人倫資生必有賢彥為人經紀宣德達教博
化篤俗故太上立德其次立功其次立言品物煥炳彝
倫攸敘也蓋梁爰在前代則夏勲配天而彭祖體地及
至周世韓服將命蔓子忠堅然顯者猶鮮豈國史簡闕

亦將分以秦楚希預華同自漢興以來迄乎魏晉多士
克生髦俊蓋世愷元之疇感于帝思於是璽書交馳於
斜谷之南東帛戔戔于梁益之鄉或迺龍飛紫閣允陟
璿璣亦有磐桓利居經綸皓素其耽懷道術服膺六藝
弓車之招旃旌之命徵名聘德忠臣孝子烈士賢女高
劬足以振玄風貞淑可以方蘋蘩者奕世載美是以四
方述作來世志士莫不仰高軌以咨詠憲洪猷而儀則
擅名八區為世師表矣故耆舊之篇較義史漢而今志

州部區別未可摠而言之用敢撰約其善為之述讚因
自注解甄其洪伐尋事釋義略可以知其前言往行矣
蜀郡士女

嚴平恬泊皓然沉冥 嚴遵字君平成都人也雅性澹
泊學業加妙專精大易耽於老莊常卜筮於市假著
龜以教與人子卜教以孝與人弟卜教以悌與人臣
卜教以忠於是風移俗易上下慈和日閱得百錢則
閉肆下簾授老莊著指歸為道書之宗揚雄少師之

稱其德杜陵李強為益州刺史謂雄曰吾真得君平
矣雄曰君但可見不能屈也強以為不然至州修禮
交遵遵見之強服其清高而不敢屈也歎曰揚子雲
真知人也年九十卒雄稱之曰不慕夷則由矣不作
苟見不治苟得久幽而不改其操雖隨和何以加諸
仲元抑抑邦家儀形 李弘字仲元成都人少讀五經
不為章句處陋巷淬勵金石之志威儀容止邦家師
之以德行為郡功曹一月而去子贄以見辱殺人大

守曰賢者之子必不殺人放之贅自以枉語家人弘
遣亡命太守怒讓弘弘對曰贅為殺人之賊明府私
弘枉法君子不誘而誅也石碣殺厚春秋譏之孔子
稱父子相隱直在其中弘實遣贅太守無以詰也州
命從事常以公正諫爭為志楊子雲稱之曰李仲元
為人也 不屈其志不累其身不夷不惠可否之間見
其貌者肅如也觀其行者穆如也聞其言者愀如也
非正不言非正不行非正不聽吾先師之所畏

子雲玄達煥乎弘聖 揚雄字子雲成都人也少貧好
道家無擔石之儲十金之費而晏如也好學不為章
句初慕司馬相如綺麗之文多作詞賦車騎將軍王
音成帝叔舅也召為門下史薦待詔上甘泉羽獵賦
遷侍郎給事黃門雄既升祕閣以為辭賦可尚則賈
誼升堂相如入室武帝讀大人賦飄飄然有凌雲之
志不足以諷諫乃輟其業以經莫大於易故則而作
太玄傳莫大於論語故作法言史莫善於蒼頡故作

訓纂箴諫莫美於虞箴故作州箴賦莫弘於離騷故
反屈原而廣之典莫正於爾雅故作方言初與劉歆
王莽董賢同官並至三公雄歷三帝獨不易官年七
十一卒自劉向父子桓譚等深敬服之其玄源淵懿
後世大儒張衡崔子玉宋仲子王子雍皆為注解吳
郡陸公紀尤善於玄稱雄聖人雄子神童烏七歲預
雄玄文年九歲而卒

林生清寂莫得而名 林閭字公孺臨邛人也善古學

古者天子有輜車之使自漢興以來劉向之徒但聞其官不詳其職惟閭與嚴君平知之曰此使考八方之風雅通九州之異同主海內之音韻使人主居高堂知天下風俗也揚雄聞而師之因此作方言閭隱遯世莫聞也

泛鄉忠貞社稷是經進賢為國稽攷典刑愛莫助之身殞朝傾 何武字君公郿人也初以對策甲科為郎歷揚兖州刺史司隸校尉京兆尹清河楚沛太守廷尉

御史大夫成帝初具三公拜大司空封泛鄉侯為人
忠厚公正推賢進士在楚致兩龔在沛厚兩唐臨司
隸致茂陵何並居公位進辛慶忌皆世名賢臨州郡
雖無赫赫之名及去民思之才雖不及丞相薛宣翟
方進而正直過之哀帝即位以朱博趙玄為公卿用
事免官諫大夫鮑子都亟言訟之丞相王嘉亦以為
慨帝復徵武為御史大夫徙前將軍時大司馬新都
侯王莽避帝外家丁傳氏遜位亦以列侯見徵哀帝

詔博舉太常莽從武求舉武以莽奸人之雄不許哀
帝崩王太皇太后莽姑也即日引莽入收大司馬董
賢印綬詔舉大司馬丞相孔光等逼王氏皆舉莽武
與左將軍公孫祿謀曰莽五父世朝權傾人主必危
劉氏乃舉祿祿亦舉武太后不從用莽為大司馬莽
諷有司劾奏皆免武就國後莽寢盛遂為宰衡安漢
公欲圖篡漢憚武與其叔紅陽侯王立不從元始三
年因呂寬吳章事檻車徵武武自煞衆咸寃之莽欲

厭衆心謚武曰刺侯子况嗣平帝崩莽因居攝後僭
王位

叔文播教變風為雅道洽化遷我寔西魯 張寬字叔

文成都人也蜀承秦後質文刻野太守文翁遣寬詣
博士東受七經還以教授於是蜀學比於齊魯巴漢
亦化之景帝嘉之命天下郡國皆立文學由翁唱其
教蜀為之始也寬徙武帝郊甘泉泰時過橋見一女
子裸浴川中乳長七尺曰知我者帝後七車適得寬

車對曰天有星主祠祀不齊潔則作女令見帝感悟
以為揚州刺史復別蛇莽之妖世稱云七車張作春
秋章句十五萬言

長卿彬彬文為世矩 司馬相如字長卿成都人也遊
京師善屬文著子虛賦而不自名武帝見而善之曰
吾獨不與此人同世楊得意對曰臣邑子司馬相如
所作也召見相如相如又作上林賦帝悅以為郎又
上大人賦以風諫制封禪書為漢辭宗官至中郎將

世之作辭賦者自揚雄之徒咸則之

王淵豔麗蔚若華圃 王褒字子淵資中人也以高才
文藻侍宣帝初為王褒作樂職中和頌宣帝時又上
甘泉洞簫賦帝善之令宮人誦之為諫大夫卒

子山翰藻遺篇有厚 楊終字子山成都人也年十三
已能作雷賦通屈原七諫章後坐太守徙邊作孤憤
詩明帝時與班固賈逵並為校書郎刪太史公書為
十餘萬言作生民詩又上符瑞詩十五章制封禪書

著外傳十二卷章句十五萬言皆傳於世者

少遷猛毅垂勲三邦 陳立字少遷臨邛人也成帝時

牂柯有亂將軍王鳳薦立為太守克平禍亂徙守巴
郡秩中二千石治有尤異又徙天水太守為天下最
天子賜黃金四十斤入為左衛護軍

世公賦政祥瑞來同 王阜字世公成都人也太守第

五倫察舉孝廉為重泉令有鸞鳥集于文學十餘日
遷益州太守神馬出滇池河甘露降白鳥見民懷之

如父母

猗歟文父叡發幼童德澹會稽道崇辟雍 張霸字伯
饒謚曰文父成都人也年數歲以知禮義諸生孫林
劉固段著等宗之移家其宇下啓母求就師學母憐
其稚對曰饒能故字伯饒也為會稽太守撥亂興治
立文學學徒以千數風教大行道路但聞誦聲百姓
歌詠之致達名士顧奉公孫松畢海胡毋官萬虞先
王演李根皆至大位在郡十年以有道徵拜議郎遷

侍中遂授霸五更尊禮於文學年老卒塋河南

少府委遲作卿作師 趙典字仲經成都人也太尉戒
孫也與潁川李膺等並號八俊三為侍中自樂祿俸
施貧方授國師未拜病卒

何楊研神貫奧入微 何英字叔俊郿人也 楊由字

哀侯成都人也二子學通經緯英著漢德春秋十五
卷孫汶字景由亦深學初徵上日食盜賊起有効為
謁者京師旱請雨即澍遷掾為屬國著世務論三十

篇卒揚由為太守廉范文學范稱能治由言當有賊
發頃之廣柔羌反殺長吏姚超鄉人冷豐齎酒候之
值客未內由為知其多少又言人當致菜其色赤黃
果有送甘橘者大將軍竇憲從太守索雲氣圖由諫
莫與尋憲受誅其明如此著書十篇而卒

司農明允國憲是維任昉字文始成都人也初為葉
令治奸賊七十餘人遷梁相尚書令清身檢下大將
軍梁冀憚之出為魏郡徙平原歲出租稅百萬冀誅

復入為尚書令司隸校尉遷大司農卒弟愷徐州刺史亦有治名昉父循字伯度為長沙太守得其父時為五官事在精通也

翁君美秀牧後寤機 何霸字翁君司空武兄也為郡戶曹刺史王尊將之官移諸郡不得遣迎太守唯霸白宜往太守遣霸尊大怒霸對曰太守遣霸非修敬也以去京師久遲知朝廷起居耳尊遽下車持節對之因奇霸容止辟為別駕舉秀才為屬國中郎將弟

闕名 潁川太守兄弟五人皆有名

伯騫推賢求善如飢 柳宗字伯騫成都人也初結九友共學號九子及為州郡右職務在進賢拔致求次方張叔遼王仲曾殷智孫等終至牧守州里為諺曰得黃金一筍不如為伯騫所議舉茂才為陽夏太守文侯顯印極位台衡 文侯趙戒字志伯少府典祖也父定以遊俠稱戒順桓帝之世歷司徒太尉登特進屢居公輔免憂患于無妄之世告歸于蜀薨家

太尉顏頤志振顏綱 趙謙字彥信戒孫也歷位卿尹

初平元年為太尉時董卓秉政欲遷天子長安謙與
司空荀爽固諫卓不聽以為車騎將軍奉大駕西幸
封洛亭侯拜司隸校尉忤卓旨免討白波賊有功封
侯進司徒免拜尚書令太僕三年薨謚曰忠侯

司徒繼踵倂免權橫 趙溫字子柔謙弟以侍中與同
輦西遷封江南亭侯兄亡初平四年拜司空未薨進
司徒當世榮之時車騎將軍李傕與董卓承張濟等爭

權數遷移天子溫以書切責於催天子聞為寒心尋
曹公入徙天子都許政出諸侯禮待溫居公位十五
年建安十三年薨

猶操道柄董卓是讓

讓責也董卓李催凶擅謙溫干

之初文侯與李固胡廣議立清河王蒜而冀欲立蠡
吾趙戒脅而從之使李固枉死君子以為卓催之惡
甚於梁冀謙摩卓之牙溫弄催之爪雖逼權勢以道
陳訓賢其祖遠矣

侍中授命分節亦章 常洽字茂尼江原人也自荊州
刺史遷京兆尹侍中長水校尉以兵衛大駕西幸催
等作難常侍衛天子左右為催所殺

蠻夷猾擾倡亂南疆子恭要傳醜穢于攘 楊竦字子
恭成都人也永初中越雋永昌夷反殘破郡縣衆十
萬餘刺史張喬以竦勇猛授從事任平南中竦先以
詔書告喻不服乃加誅殺虜三萬餘人獲生口千五
百人財物四千萬降夷三十六種舉正奸濁長吏九

十人黃綬六十人南中清平會被傷卒喬舉州吊贈
列畫東觀

伯春孟元匡正時君 張充字伯春 李晃字孟元江

源人也充為治中從事時刺史恃豪每見從事布席
地坐已自安高床上充入閣不肯進刺史悟乃更禮

從事刺史辟公孫特大姓健為李威橋稚充曹

闕事節

時有水災倫受刺史指以漢中斗平不足表聞晃固
爭之後刺史至與倫不平求郡短劾倫不言水灾晃

對以詔書上災異不得由州倫遷司空辟兗掾

兗居希切

說文兗古字微也始出今作幾

楊羅為小遺愛在民 楊班字仲桓成都人也 羅衡

字仲伯郫縣人也俱師徵士何初山班為不韋茂陵
令治化浹洽徙西城閭中令號時名宰衡為萬年令
路不拾遺人家牛馬皆繫道邊曰屬羅公三府爭辟
拜廣漢長二縣皆為立祠

小伯溫恭預圖息紛 陳湛字小伯成都人也歷數縣

令民皆懷之州辟治中從事廣漢太守遣子詣州修
歡交使君欲納湛諫不可失羔羊義使君從之後有
言州郡私交者考之無得乃明也

孟由至孝遐棄睇風禽堅字孟由成都人也父信為
縣史越雋為夷所得傳賣歷十一種去時堅方姪六
月生母更嫁堅壯乃知父湮沒鬻力傭賃求碧珠以
求父一至漢中三出徼外周旋萬里經六年四月突
瘴毒狼虎乃至夷中得父相見悲感夷徼哀之即將

父歸迎母致養州郡嘉其孝召功曹辟從事列上東
觀太守王商追贈孝廉令李苾為立碑銘迄今祠之
仲呈免師 仲呈成都人也少受學於嚴季后季后為
汶江尉書呼仲呈仲呈許十月往會夷反斷道仲呈
期於往經渡六千幾死數年卒得至汶江為季后陳
策俱得免難遠近歎之

叔本慕仁 任末字叔本繁人也與董奉德俱學京師
奉德病死推鹿車送其喪師亡身病齋棺赴之道死

遺令勅子載喪至師門敘平生之志也

伯禽證將 朱普字伯禽廣都人也為郡功曹太守與
刺史王冀有隙枉見劾普詣新都獄掠笞連月肌肉
腐臭惡同死人證太守無事勅其子曰我死載喪詣
闕使天子知我心事得情理普以烈聞

文寺代君 李磬字文寺嚴道人也為長章表主簿旄
牛夷叛入攻縣表倉卒走鋒刃交至磬傾身捍表謂
虜曰乞然我活我君虜乃然之表得免太守嘉之圖

象府庭

在三義敦終始可稱 人生于三事若一君父師也言人
靡不有初鮮克有終普馨可謂能終始也

炎光中微巨述僭亂 炎火光也漢以火德王自高祖
至平帝十二世國嗣三絕平帝早崩安漢公王莽字
巨君遂篡天子位稱新室皇帝而茂陵公孫述字子
陽為莽導江卒正遂僭號于蜀

章王劓首 章明字公孺新繁人也 王皓字子離江

原人也明為太中大夫莽篡位歎曰不以一身事二主遂自煞皓為美陽令去莽歸蜀公孫儋號使使聘之皓乃自刎以頭付使者述慙怒誅其妻子

侯剛哭漢 剛字直孟新繁人也為郎見莽篡位佯狂負木斗守闕號哭莽使人問之對曰漢祚無窮吾寧死之不忍事非主也莽追煞之

公卿絕脰亦蹈節貫 王嘉字公卿江原人為郎去莽還留蜀公孫述先閉其妻子使人徵之嘉聞王皓死

歎曰吾後之哉亦自然述慙貫其妻子

羅生美至思濟艱難述方遂非殘彼貞幹 羅衍字伯

紀成都人也為述郎說述尚書解文卿鄭文伯使諫
述降漢為子孫福解鄭從之述怒閉二子於薄室六
年二子守志不回遂以幽死衍察孝廉徵博士

劉主割據資我英俊鴻臚淵通與道推運 何宗字彥

英郾縣人也通經緯天官推步圖讖知劉備應漢九
世之運讚立先主為大鴻臚方授公輔會卒

君肅矯矯穎類倬羣 何祗字君肅宗族人也初捷為

楊洪為太守李嚴功曹去郡數年以為蜀郡嚴在官祗為洪門下書佐去郡數年以為廣漢洪猶在官是以西土咸服諸葛亮之能攬拔秀異也祗徙捷為太守卒

輔漢朗捷服時之懃 張裔字君嗣成都人也汝南許文休稱其才鍾元常輩也為輔漢將軍丞相長史丞相北征居府統事足食足兵

太常清密邃遠鉤深杜瓊字伯瑜成都人也師事任安粗通經緯術藝為太常沉默慎密稱諸生之淳

休休衆彥殊途同臻金聲玉振蜀之球琳休休美也衆彥言此四十三人也易曰殊塗同歸百行齊致貴於流光顯稱揚名垂世此四十三人者雖立行不同俱以垂美如金玉之音器為世名寶

述蜀郡人士

敬司穆穆暢始玄終敬司馬氏女五更張伯饒妻也

霸前妻有三男一女敬司產一男撫教五子恩愛若
一霸卒葬河南敬司與諸子還蜀疾病遺令告諸子
曰舜葬蒼梧二妃不從汝父在梁吾自在蜀亦各其
志勿違吾勅也遂葬蜀子先起稟母教為聘士也

叔紀婉婉十媛仰風 叔紀霸女孫也適廣漢王尊至
有賢訓事姑以禮生子商海內名士廣漢周幹古朴
彭總漢中祝龜為作頌曰少則為家之孝女長則為
家之賢婦老則為子之慈親終溫且惠秉心塞淵宜

謚曰化明惠母

公乘氏張兩髦義崇

公乘會妻廣都張氏女也夫早

亡無子姑及兄弟欲改嫁之張誓不許而言之不止
乃斷髮割耳養會族子事姑終身

助陳撫孩節篤分充

助陳臨邛陳氏女健為揚鳳珪

妻也鳳珪亡養遺生子守節兄弟必欲改嫁乃引刀
割咽宗族駭之幾死遂全其義

二常煒煒顏構再隆

元常靡常江原人也元常廣都

令常良女適廣漢便敬賓早亡元常無子養賓族子
父母欲嫁乃祝刀誓志而死靡常仲山女適成都殷
仲孫家遭疫氣死亡惟靡常在年甫十八收葬諸喪
養餘生子立美成家

紀常哀哀精感昭融 紀常常侍常洽女趙侯夫人也
父遇害在長安一兄皆先沒遣父門生瞿登張順迎
喪時寇賊蜂起晝夜悲哀順登得將喪無恙還時人
皆以紀常精誠所感

貢羅誓志 貢羅郛羅倩女景奇妻也奇早亡無子父
愍其年壯以許同郡何詩貢羅白晝誓父不還家父
使詩乃白州州告縣逼遣之羅乃訴州刺史高而許
之

玗何忘生 玗何郛何氏女成都在趙憲妻也憲早亡無
子父母欲改嫁何恚憤自幽乃不食旬日而死郡縣
為立石表

昭儀徇身 昭儀新繁張氏女廣漢朱叔賢妻也賢為

郡督郵建安十九年劉主圍劉璋於成都賢坐謀外
降璋以昭儀配兵將見逼昭儀自殺三軍莫不哀歎
二姚見靈廣柔長郗姚超二女姚妣饒未許嫁隨父
在官值九種夷反殺超獲二女欲使牧羊二女誓不
辱乃以衣連腰自沉水中死見夢告兄慰曰姊妹之
喪當以某日至溉下慰寤哀愕如夢日得喪郡縣圖
象府庭

峨峨淑媛表圖銘旌 淑善媛婉婉也言此十二女皆


圖象列傳

述蜀郡列女

右蜀郡士女讚第一

凡五十五人

四十三人
士十二人
女



華陽國志卷十上

欽定四庫全書

史部

華陽國志卷十
中下

詳校官編修臣李潢

侍讀臣孫球覆勘

總校官中書臣朱鈐

校對官助教臣胡子襄

謄錄監生臣崔堂

欽定四庫全書

華陽國志卷十中

廣漢士女

晉 常璩 撰

講學冲邃洙泗是稀
帝昭聖庶熙疇咨
楊宣字君緯什邡人也
少受學於楚國王子
張天文圖緯於河
內鄭子侯師事楊翁
叔能暢鳥言長於灾
異教授弟子以百數
成帝徵拜諫大夫
帝無嗣宣上封事
勸宜

以定陶恭王子爲太子帝從之出宣爲交州牧太子
即位爲哀帝拜河內太守徵太倉令上宜封周公孔
子後帝從之封周公孫相如爲褒魯侯孔子後孔均
爲褒成侯又薦遼東王綱瑯琊徐吉太原郭越楚國
龔勝等宜讚隆時雍平帝時命持節爲講學大夫與
劉歆共校書居攝中卒門生河南李吉廣漢嚴象趙
翹等皆作大儒

長伯撫遐聲暢中畿析虎命邦綽有餘徽 鄭純字長

伯鄴人也爲益州西部都尉處地金銀琥珀犀象翠羽出作此官者皆富及十世純獨清廉毫毛不犯夷漢歌歎表聞三司及京師貴重多薦美之明帝嘉之乃改西部爲永昌郡以純爲太守在官十年卒列畫頌東觀

三老決決實作父師 楊統字仲通新都人也事華里先生炎高高戒統曰漢九世王出圖書與卿適應之建武初天下求通內識二卷者不得永平中刺史張志舉

統方正司徒魯恭辟掾與恭共定音律上家法章句
及二卷解說遷侍中光祿大夫以年老道深養於辟
雍授几杖爲三老卒內識二卷竟未詳

平仲涉道殆乎庶幾 王祐字平仲鄭人也少與維高
士張浮齊名不應州郡之命司隸校尉陳紀山名知
人稱祐天下之高年四十二卒弟獲志其遺言撰王
子五篇東觀郎李勝文章士也作誄方之顏子列畫

學宮

獲一作灌

文父明洞探蹟索微 楊序字仲桓統仲子也道業侔
父三司及公車連徵辭拜侍中上言四方反荆揚交
州當兵起人民疫蝗洛陽大水宮殿當灾三府當免
近戚謀變皆効驗大將軍梁冀秉權自退去授門徒
三千人本初元年及建和中特徵聘不行年八十三
卒天子痛惜詔諡曰文父弟子雒昭約節宰綿竹寇
懼文儀蜀郡何萇幼正侯祈升伯巴郡周舒叔布及
任安董扶等皆徵聘辟舉馳名當世

元章玄泊韜光匿耀

段翳字元章新都人也明經術

妙占未來常告大渡津口曰某日當有諸生二人荷
擔問翳舍處者幸爲告之後竟如其言又有人從冀
州來學積年自以精究翳術辭去翳爲筒作書封頭
與之告曰有急發之至葭萌爭津吏撾從者頭諸生
發筒筒中有書曰到葭萌爭津破頭以膏裹之生乃
喟然知不及翳還更精學翳常隱匿不使人知門人
皆號夫子

稚子弈弈古之畏愛 王渙字稚子鄴人也初爲河內
溫令路不拾遺卧不閉門民歌之曰王稚子世未有
平徭役百姓喜遷兗州刺史部中肅清徵拜侍御史
洛陽令聰明惠斷公平廉正抑強扶弱化行不犯發
奸擿伏思若有神京華密靜權豪畏敬元興元年卒
百姓痛哭二縣弔祭行人商旅莫不祭之賈胡左威
遭其清理制服三年洛陽弦歌之爲立祠天子悼惜
每下詔書德令必賜後嗣與卓茂等爲伍

敬伯愷悌樹德播惠 王堂字敬伯鄆人也初臨巴郡
進賢達士舉孝子嚴永隱士黃錯及張璠陳髦民爲
立祠徙任左扶風政教嚴明帝舅車騎將軍閭顯大
將軍竇憲中常侍江京等囑託輒拒之白鹿見象不
以爲祥徙魯相又徙汝南守舉陳蕃爲功曹應嗣司
隸校尉號知人之鑑

叔宰濟濟以禮進退 馮顥字叔宰鄆人也少師事楊
仲桓及蜀郡張光超後又事東平虞叔雅初爲謁者

威儀濟濟爲成都令遷越雋太守所在著稱爲梁冀所不善冀風州追之隱居作易章句及刺奢說脩黃老恬然終日

大匠竒暢妙監玄察盡言世規祇以隕越 翟酺字子超雒人也少事段熲以明天官爲侍中尚書常見太史令孫懿歔歔涕泣曰圖書有賊臣孫登將以才智爲黃門開路君表相應之是以悽愴後爲京兆尹光祿大夫將作大匠上言漢四百年當有弱主閉門聽

政數在三百年之間薦故太尉龐參故司徒李邵明
通三才忠正可以輔世所言每指利疾權貴誣黜及
尚書令高堂芝交構免死著援神契經說卒家

司隸聰敏奮名後葉 郭賀字喬卿雒人也初爲太守

黃幸戶曹幸有事與漢中太守李榮俱被徵賀勸幸
星行詣詔獄自歸得免榮稽留詔殺之由是顯名太
守蔡茂命爲主簿茂夢坐太極殿上得嘉禾三穗以
問賀對曰明府位當至三公旬月茂遷司徒表賀明

律令稍遷侍中尚書僕射司隸校尉荊州刺史明帝南巡狩善其治徵河南尹卒天子痛惜賜錢三十萬

鐔蔡翩翩交友惟賢

鐔顯字子誦鄴人也蔡弓字子

騫雒人也俱攜手共學冬則侍親春行受業與張霸李邵張皓陳禪爲友共師司徒魯恭顯又與王稚子同見察孝於太守陳司空歷豫州刺史光祿大夫侍中衛尉弓爲廬江太守徵拜郎而霸邵皓禪皆至公

卿

兩李麗采文藻可觀 李尤字伯仁李勝字茂通雖人也侍中賈逵薦尤有相如揚雄之才明帝召作東觀
辟雍德陽諸觀賦銘懷戎頌百二十銘著政事論七
篇帝善之拜諫大夫樂安相後與劉珍共撰漢記孫
充有文才勝爲東觀郎著賦諫論頌數十篇

憲父懸車 王稚字叔起堂幼子也屢拒孝廉公府十
五辟公車徵及授二千石徵以太常終不詣年八十
一卒門人錄其本行諡曰憲父癸未詔書以安車聘

請會已亡

徵君肥遯 馮信字季誠鄆人也郡三察孝廉州舉茂才公府十辟公車再徵不詣公孫述時託目青盲傳婢姦其前陽不覺述卒以年老不出

董任循志束帛戔戔 董扶字茂安任安字定祖綿竹人也家居教授弟子自遠而至扶初應賢良方正詣京師宰府十辟公車三徵再舉有道爲侍中觀漢將亂求爲屬國還蜀安察孝及茂才公府辟公車徵皆

不詣卒布衣弟子杜微何宗杜瓊皆名士至卿佐

文表汜博提攜士彥 王商字文表廣漢人也博學多

聞州牧劉璋辟爲治中試守蜀郡太守荊州牧劉表

大儒南陽宋仲子遠慕其名皆與交好許文休稱商

中夏王景興輩也商勸璋攬奇拔雋甚善匡扶薦致

名士安漢趙韙及陳寔盛先塾江龔楊趙敏黎景

閔中王澹江州孟彪皆至州右職郡守又爲嚴李立

祠正諸祀典在官一十年而卒

超類拔萃寔惟世信 劉寵字世信綿竹人也出自孤
微以明公羊春秋上計闕下見除成都令政教明肅
時諸縣多難治乃換寵爲郫令又換郫安漢皆垂績
還在成都遷牂柯太守初乘一馬之官布衣䟽食儉
以爲教居郡九年乘之而還吏人爲之立銘王商陳
實當世貴士皆與爲友

節英亢烈仰訴鼎臣 段恭字節英雄人也少周流七
十餘郡求師受學經三十年凡事馮翊駱異孫泰山

彥之章渤海紀叔陽遂明天文二卷東平虞叔雅學
絕高當世遂遊於蜀恭以朋友禮待之後爲上計掾
會有司劾太尉龐參兼舉茂才孝廉參性忠正亮直
爲貴戚所擯以恚發病遠近稱冤恭不能耐其枉亢
䟽表參忠直不當以讒佞傷毀忠正帝悟即日召西
曹掾問疾尋羊酒慰勞參忠

士遊孝淳感物悟神 姜詩字士遊雒人也事母至孝
母欲江水及鯉魚膾又不能獨食須隣母共之詩嘗

供備子汲江溺死秘言遣學不使母知於是有涌泉
出於舍側有江水之香朝朝出鯉魚二頭供二母之
膳其泉灌田六頃施及比隣公孫述平後東精爲賊
掠害不敢入詩里時大荒餓精致米肉與詩詩埋之
永平三年察孝廉明帝詔曰大學入朝孝廉一切皆
平之除江陽符長所居鄉皆爲之立祠

少林陰德陽報是甄 王忱字少林新都人也遊學京
師見客舍有一書生疾困忱憇視奄忽便絕有金十

斤忱以一斤買棺木九斤置棺下葬埋之後爲大度亭長有馬一疋馳入亭中又有繡被一領飛墮其前人莫識者郡縣以畀忱後乘馬到雒縣馬牽忱入它舍主人問忱所由得馬忱具說其狀并及繡被主人悵然曰卿何陰德而致此忱說昔埋書生事主人驚曰是我子也姓金名彥卿葬之大恩不報天彰卿德耳辟舉茂才除郿令宿釐亭中數有人爲鬼所殺忱上樓夜半有女子稱冤曰妾涪令妻也當之官宿此枉爲

亭長所殺大小二十口埋在樓下奪取財物恠曰汝何故以恒殺人女子曰妾不得白日惟依夜愬人眠不肯應恚故殺之初來時言無衣恠以衣衣之言訖投衣而去旦召遊徼詰問具服即收同謀十餘人殺之送涪令喪還郡里當世稱之

仲魚謙沖 羊晷字仲魚鄴人也父爲交州刺史卒官晷迎喪不敢取官舍一物郡三察孝廉公府辟州別駕皆不應太守尹奉棄刑名行禮樂請爲功曹刺史

必欲借基自佐不得已爲別駕後爲太守孫寶蔡茂
役諷功曹當欲渡津津吏滯停車待之三日將宿中
亭中有縣吏引車避之爲野王令

雲卿安貧 朱倉字雲卿什邡人也受學於蜀郡張寧
食豆飲水以諷誦同業憐其貧資給米肉終不受著
河洛解家貧恒以步行爲郡功曹每察孝廉羞碌碌
詣公府試不就州辟治中從事以諷詠自終

伯式玄照 折像字伯式雒人也其先張江爲武威太

守封南陽折侯因氏焉父國爲鬱林太守家貲二億
故奴姬八百人盡散以施宗族卹贍親舊葬死弔喪
事東平虞叔雅以道教授門人朋友自遠而至時人
爲諺曰折氏客誰朱雲卿段節英中有佃子趙仲平
但說天文論五經

孟宗當仁味道好施清風邁倫 讚仲魚已下也杜真
字孟宗綿竹人誦書百萬言兄事翟酺酺免後尚書
令與司隸校尉枉劾之復徵詣獄真上章救之受掠

笞六百獄中明酺無事京師壯之以漢道微散財施宗族不應公州辟命及辭長吏候迎每交於門乃斷髮以自絕

漢儒請雨精感慶雲 諒輔字漢儒新都人爲郡五官掾時天大旱請雨不降輔出禱祈乃積薪祝神曰不雨則欲自焚爲貪叨吏謝罪百姓言終暴雨

韓揆義烈 韓揆字伯彥綿竹人也爲令錡裒主簿值黃巾賊入界扶裒走入草中裒遣求隱翳處未還裒

爲賊所得見害揆殯殮葬埋訖詣從事賈龍求兵討賊賊破曰本報令君而苟自活非忠乃自殺

喬雲勇震左喬雲綿竹人也少爲左通所養爲子通坐任徒逃吏欲破通牘通無壯子故爲吏所侵喬雲時年十三喟然憤怒以銳刀殺吏解通將走令出追初聞以爲壯士及知小兒爲之流涕

楊寬證將烈播友人寬字叔仲新都人父斌證令萬世太守祓諷以忠義壯聞寬爲郡吏鄉人馬閏章言

太守王方寬與兄偕詣獄證之得理後方當遷南郡
閨復章之寬乃發閨臨私事閨伏罪友人汝錕爲張
明所殺寬怒縛明送錕家使自謝之也

甯叔執仇 甯叔字茂泰廣漢人與友人張昌共受業
太學昌爲河南大豪呂條所殺叔殺條自拘河南獄
順帝義而赦之

張復師讎 張鉗字子安廣漢人也師事犍爲謝裒裒
死負土成墳三年裒子爲人所殺鉗復其仇自拘武

陽獄會赦免當世義之

賈爲士死分侔虞朱 賈昶字元集什邡人也雖孟伯
元爲父復讎聞昶名往投之雒縣追伯元蹤昶歎曰
士以義遇我豈可倍哉殺雒縣必移什邡負我君乃
自殺李勝言之以方虞卿魯之朱家

郭玉通直蓋亦所脩 郭玉字通直新都人也明方術
伎妙用針作經方頌說官至太醫丞校尉

爰迄劉氏司農含章爽朗瑰梁觀國之光 秦宓字子

勅綿竹人也初隱遁不應州郡之命丞相亮領益牧以選爲別駕中郎將吳使張溫將反命亮率百官餞之溫與宓語答問若響應聲辭義雅美溫大敬服以爲蜀之有宓猶魯仲尼也遷長水校尉司農宓甚有通理弟子譙周具傳其業

李王四子並作琳琅 李朝字永南弟邵字偉南鄰人也王士字義強從弟甫字國山文表諸弟也先主領牧朝爲別駕羣下上先主爲漢中王其文朝所造也

後丞相亮府辟西曹掾亦有文才兄弟三人號三龍
士歷宕渠犍爲益州太守甫善言議闕人流美稱自
綿竹令爲州右職

優遊客與特進太常 鐔承字公文郵人也歷郡守州
右職爲少府太常時費姜秉政孟光來敏皆棲遲承
以和獨立特進之也

從事烈至諫君刎首 王累新都人也州牧璋從別駕
張松計遣法正迎先主主簿黃權諫不納累爲從事

以諫不入乃自刎州門以明不可

鄭度進規忠謀莫受雖云天時抑由人咎 度綿竹人也先主自葭萌南攻說牧璋曰左將軍懸軍襲我野穀是資急驅巴西梓潼民內涪水以南一切燒除野穀固壘待之彼請戰不許久無所資不過百日必當回先主聞而惡之璋不納言雖在天亦由璋之愚

永年負才自喪世主 彭義字永年廣漢人有俊才劉

璋時坐事爲徒及先主入自託龐統爲州右職失主

意左遷江陽太守羨望諸葛亮以爲心大志廣難可
保勸先主因事誅之

漢南哽哽天奪其守 李邈字漢南邵兄也牧璋時爲
牛鞞長先主領牧爲從事正旦命行酒得進見讓先
主曰振威以將軍宗室肺腑委以討賊元功未効先
寇而滅邈以將軍之取郫州甚爲不宜也先主曰知
其不宜何以不助之邈曰匪不敢也力不足耳有司
將殺之諸葛亮爲請得免久之爲犍爲太守丞相參

軍安漢將軍建興六年亮西征馬謖在前亮將殺之
邈諫以秦赦孟明用霸西戎楚誅子玉二世不競失
亮意還蜀十三年亮卒後主素服發哀三日邈上疏
曰呂祿霍禹未必懷反叛之心孝宣不好爲殺臣之
君直以臣懼其偏主畏其威故姦萌生亮身杖強兵
狼顧虎視五大不在邊臣常危之今亮殞歿蓋宗族
得全西戎靜息大小爲慶後主怒下獄誅之

說說彥造或哲或友昭德音芳垂名厥後 摠讚此四

十六人也

述廣漢人士

任母治內子成名賢 任安母姚氏也雍穆閨門早寡
立義資安遂事大儒安教授每爲賑卹其弟子以慰
勉其志於是安之門生益盈門

龐行養姑婦師之先 龐行姜詩妻也事姑晝夜紡績
以給供養子汲江溺水死秘言遺詣學常作冬夏衣
投水中託言寄與子詩呼妻使爲姑舂應命遲見遣

不敢遠去遊於外供給因隣母致姑勅還

依依義舊抗疏邦庭誠感世主徙女輟刑 義舊狄道

長姜穆女綿竹司馬雅妻也既許婚父坐事徙朔方

雅就婚死雇人送其喪尋父母死朔方義舊獨與弟

孤居十年士大夫求終不肯乃上疏自訟求還鄉里

天子愍悼下朔方使送遂下詔書定律令女已許嫁

不得從父母徙

紀配斷指以章厥貞

紀配廣漢殷氏女廖伯妻也年

十六適伯伯早亡已自有美色慮人求已作詩三章
自誓心而求者猶衆父母將許乃斷指明情養子猛
終義太守薛鴻圖象府庭

彭王進娥殘體令誠 彭非廣漢王輔妻也王和新都
人便敬妻也李進娥鄴人馮季宰妻也輔早亡叔父
欲改嫁非乃詣太守五方截髮自誓敬亦早亡和養
孤守義蜀郡何玉因媒介求之兄曉諭以公族可憑
和恚割其一耳季宰亦早亡父母欲改嫁進娥亦剪

髮自誓各養子終義

正流自沈水絜冰清 正流廣漢李元女楊文妻也適

文有一男一女而文沒以織履爲業父欲改嫁乃自

沈水中宗族拯之幾死得免太守五方爲之圖象

相烏袁福義不存生 相烏德陽人袁稚妻也十五適

稚二十稚亡無子父母欲改嫁之便自殺袁福亦德

陽人王上妻也有二子上以喪親過哀死福哀感終

身父母欲改嫁乃自殺

洪氏世胄由婦謙柔 汝敦妻某敦兄弟共居有父母
時財嫂心欲得妻勸送二兄敦盡讓田宅奴婢與兄
自出居後敦耕得金一器妻復勸送二兄夫妻共往
嫂性恠嗇謂欲借貸甚不悅及見金踊躍兄感悟即
出妻讓財還第弟不受相讓積年後並察孝廉世爲
冠族

思媚烈媛美稱惟休 揔讚十一人也

述廣漢列女

右廣漢郡士女讚第三

凡五十七人

四十六人
士十一人
女

犍爲士女

王延河平纂禹之功 王延世字長叔資中人也建始
五年河決東郡汜濫兗豫四郡三十二縣沒官民屋
舍四萬所御史大夫尹忠以不憂職致河決自殺漢
史案圖緯當有能循禹之功在犍柯之資陽求之正
得延世徵拜河堤謁者治河以竹落長四丈大九圍

夾小船載小石治之三十六日隄防成帝嘉之改年
曰河平封延世關內侯拜光祿大夫乃賜黃金百斤
文伯習禮繼武孫通 董鈞字文伯資中人也少受業
於鴻臚王臨永平初議天地宗廟郊祀儀禮鈞與太
常定其制又定諸侯王喪禮歷城門校尉五官中郎
將以儒學貴稱繼叔孫通

張公執憲克智克聰極位青紫寔作司空 張皓字叔
明武陽人也以文聰明辟大將軍掾遷尚書僕射彭

城相進隱士閭丘遷等徵拜廷尉延光三年安帝將廢太子爲濟陰王皓與太常桓焉太僕來歷爭之安帝不許及安帝崩濟陰得立爲順帝以皓爲司空久之免後徵爲廷尉清河趙騰等坐謗訕當誅所引八十餘人皓以聖賢明義爭之咸稱平當

子鸞司京桴鼓不鳴 趙旂字子鸞資中人也初臨甘陵弘農郡甚善治民徵尚書遷司隸校尉時梁冀子弟放恣旂以法繩之不敢爲非京師肅清桴鼓不鳴

孟文翹翹平顯有成 楊渙字孟文武陽人也以清秀
博雅歷臺郎相稍遷尚書中郎司隸校尉甚有嘉聲
美稱

伯邳正直耀祖揚聲 楊準字伯邳漢安縣人也初爲
郡守太尉李固薦準累世忠直拜尚書太傅陳蕃表
爲河東入爲尚書令奏書治南陽太守曹麻潁川太
守曹騰濟南太守孫訓等子弟依託形勢淫縱徵廷
尉治罪訓梁冀婦家子也於是憚之又薦朱禹盛精

滕延爲尚書陸稠爲郡守皆名士也桓帝即位拜河南尹遷司隸校尉冀叔父梁忠爲執金吾不朝正初劾奏之朝士服其公亮徙將作大匠

翁君將命迺播其名 楊莽字翁君武陽人爲功曹刺史王尊當之州移書諸郡不得遣迎惟犍爲遣莽何霸巴郡遣嚴尊尊大怒莽前對曰使君不使奉迎謙也太守承迎敬也謙敬上下之節不可廢也尊乃欣請辟別駕舉茂才官至揚州刺史

奉君遜世 費貽字奉君南安人也公孫述時漆身爲
厲佯狂避世述破爲合浦守蜀中歌之曰節義至仁
費奉君不仕亂世不避惡君脩身於蜀紀名亦足後
世爲大族

任公開明 任永字君業犍道人也長歷數王莽時託
青盲公孫述時累徵不詣子溺井中死見而不言妻
淫於前面而不怪述平乃曰世適平目即清妻自殺
光武徵之以年老不詣卒

叔和順終

杜撫字叔和資中人也少師事薛漢治五

經教授門生千人太守王卿召爲功曹司徒辟不及
聞公免必往承問東平憲王爲驃騎將軍辟西曹掾
後罷爲王師在驃騎府者遣之數年乃去建初中爲
公車令數月卒作詩通議說弟子南陽馮良亦以道
學徵聘

君橋密精

趙松字君橋武陽人爲童子數咨問費貽

及知其避世密與周旋終不露之也述平舉茂才爲

上黨太守

英英四子利於居貞 讚費貽以下

皇漢弛綱官人失紀文紀蹇諤表明臧否 張綱字文
紀司空皓子也在漢朝公平廉正權宦側目憚之漢
安元年以光祿大夫持節與侍中杜喬循行州郡考
察風俗出宮垣埋車先奏太尉桓焉司徒劉壽尸祿
素餐不堪其職出城又奏司隸校尉趙峻河南尹梁
不疑汝南太守梁乾等臧穢濁亂檻車送廷尉治罪

天子以乾梁冀叔父貶秩免峻等又奏魯相寇儀儀
自殺威風大行郡縣莫不肅懼還冀恨之出爲廣陵
太守承叛亂後懷集撫卹甚有治化在官十年卒子
續爲尚書續弟方爲豫州牧子孫數世至大官

白虜狂僭亂離斯圯孝仲繫馬社稷是死 朱遵字孝
仲武陽人也公孫僭號遵爲犍爲郡功曹領軍拒戰
於六水門衆少不敵乃埋車輪絆馬必死爲述所殺
光武嘉之追贈復漢將軍郡縣爲立祠

建侯弔梁効志知己 趙敦字建侯武陽人也初爲新
都令德禮宣流三司及大將軍梁冀累辟終不詣冀
辟書不絕後冀自殺使者監守不使人弔問敦獨往
弔祭訖自拘有司天子赦之

叔通敦孝石生江汜 隗相字叔通犍道人也養母至
孝母食欲江中正流水相冬夏汲之一朝有橫石生
正流中哀帝世察孝廉平帝世爲郎

吳生致養亦感靈祉 吳順字叔和犍道人也事母至

孝赤烏巢其門甘露降其戶察孝廉永昌太守

劉后初載實多良才季休忠亮經事能治 楊洪字季
休武陽人也先主領牧爲部屬從事及征漢中丞相
亮表爲蜀郡太守先主疾病永安召亮東行漢嘉太
守黃元反後主從其計克元封關內侯後爲中郎將
校尉忠清款亮亮甚信任之

德山耽學道以光時 伍梁字德山南安人也儒學雅
尚州選迎牧諸葛亮爲功曹遷五官中郎將

烈武作合度曠塗夷惜哉公舉帥直凌遲 費詩字公

舉南安人也先主領牧爲前部司馬羣臣勸先主稱
尊號詩上疏曰殿下以曹操父子逼主篡盜故乃羈
旅萬里糾合士衆將以討賊今大敵未克而先自立
恐人心疑惑昔高祖獲子嬰猶尚推讓況未出門便
欲自立耶以是左遷部永昌從事建興三年從丞相
亮南征魏將李鴻來降說魏新城太守孟達欲背魏
向蜀亮方北面欲招達爲外援欲與書詩進曰孟達

小子昔事振威不忠後事先帝背叛反覆之人何足
與書也亮嘿然詩終劉氏之世官位不盡其才君子
以昭烈之弘曠武侯之明達詩吐直言猶尚凌遲況
庸主昏世帥意直言而望肆効者哉

文然簡略不從詭隨 楊義字文然武陽人也輔漢將
軍張裔薦爲丞相亮主簿大司馬蔣琬辟東曹掾歷
二郡太守爲射聲校尉性簡略未曾以甘言加人酒
後言笑多慢詞失大將軍姜維意爲維所廢延熙十

八年作季漢輔臣讚在蜀書

車騎快快與國安危 張翼字伯恭文紀孫也以文武
才幹歷征西鎮南大將軍封亭侯延熙十八年與大
將軍姜維西征大破魏雍州刺史王經於狄道經衆
死洮水者數萬人維欲進翼諫不可進必無功時維
屢出隴西翼常庭爭以國小不宜黷武必爲蛇畫足
不聽不得已每快快從行景耀元年遷左車騎將軍
領冀州刺史蜀平後死

猗猗衆偉芳烈名垂方德繹勲捷之瓊瑰

述捷爲人士

進楊穆穆先姑是憲 進武陽楊氏女大匠廣漢王堂
長子博妻也博後母文有母儀之德進楊則其教爲
行閨門雍穆牂柯太守李裒家亦假係每不和歎恨
徒富貴學問不及博家也

陽姬請父厥族蒙援克諧內愛訓及秀彥 姬武陽人

也生自寒微父

闕

坐事閉獄楊渙始爲尚書郎告歸

郡縣敬重之姬爲處女乃邀道扣渙馬訟父罪言辭
慷慨涕泣渙懇告郡縣爲出其父因奇其才爲子文
方聘之結婚大族二弟得仕宦遂世爲宦門後文方
爲漢中太守以趙宣爲賢將察孝廉函封未定病卒
姬秘不發先遣孝廉上道乃發喪宣得進用姬之力
也後文方兄子伯邳爲司隸校尉時姬長子穎伯冀
州刺史仲子頰二千石伯邳以稟叔母教迎在官舍
每教邳政治伯邳欲舉茂才選有二人伯邳欲用老

者嫌其年耄欲舉五方而其年幼以咨叔母勸舉方
後趙宣爲犍爲五方爲廣漢姬尚在故吏之敬四時
承問不絕

周度割體貞節是全 周度輿道人也相登妻十九登
亡中年令吳厚因人爲子求之斷髮以誓志後人猶
欲求之乃割其鼻養子早亡其妻左亦年十九遂俱
守義世感歎婦姑之貞專其節操也

敬姬沈淵誠烈邈然 曹敬姬南安人也周紀之妻十

七出適十九紀亡遺生子元餘服闋父母以許孫賓
紿母病迎還知之自投水人赴之氣已絕一日一夜
乃蘇息送依紀弟居訓導元餘號爲女學士年九十
卒

貞玦玉操彌久不刊 貞玦字瓊玉牛鞞程氏女張惟
妻也十九適惟未暮惟亡無子養兄子悅供養舅姑
夙夜不怠資中王冲欲娶玦玦叔父肱荅以女志不
可奪冲爲太守李嚴督郵嚴託縣遣孝義掾奉羔鴈

宣太守命聘之玦乃自投水球援不死後太守蘇高

爲立表太守蜀郡

關

遣仁恕掾論曰貞玦太守章

陵劉威又爲作頌故稱述也

韓姜自財后旌其冤

韓姜熨人尹仲讓妻也二十讓

亡服除資中董臺因從事王爲表弟求姜不許臺門

生左習王蘇以爲姜可奪教姜家言母病迎還韓氏

因逼成婚姜聞故自殺太守巴郡龔楊哀之殺習蘇

以報姜死

謝姬引決同穴齊寔

姬南安人武陽儀成妻也成死

以己年壯無子將葬乃預作殯殮具毒藥須夫棺入
墓拊棺吞藥而死遂同葬縣以表郡郡言州州上尚
書天子咨嗟下書每大赦賜家帛四疋蜀穀二石

媛姜疋婦勉夫濟子授命囹圄義踰國士 趙媛姜資

中人盛道妻也建安五年道坐過夫婦閉獄子翔方
年五歲姜謂道曰官有常刑君不得已矣妾在後何
益君門戶君可同翔亡命妾代君死可得繼君宗廟

道依違數日姜苦言勸之遂解脫給衣糧使去代爲
應對度走遠乃告吏殺之後遇赦父子得還道雖仕
宦當世痛感終不更娶翔亦不仕耳

黃帛求喪沉身中流靈精相感攜夫共浮黃帛轅道
人張貞妻也貞受易於韓子方去家三十里船覆死
貞弟求喪經月不得帛乃自往沒處躬訪不得遂自
投水中大小驚睨積十四日持夫手浮出時人爲語
曰符有先絡轅道帛求其夫天下無有其偶縣長韓

子冉嘉之召帛子幸之爲縣股肱

烈哉諸媛節稱義遵叙之讚此九女也

述健爲列女

右健爲士女讚第四

凡三十人

二十一人
士九人
女

華陽國志卷十中

欽定四庫全書

華陽國志卷十下

晉 常璩 撰

漢中士女

鄭真岳跼確乎其清 鄭子真褒中人也玄靜守道履
至德之行乃其人也教曰忠孝愛敬天下之至行也
神中五徵帝王之要道也成帝元舅大將軍王鳳備
禮聘之不應家谷口世號谷口子真亡漢中與立祠

神中五徵

未詳其義

衛梁泥盤玄湛淵亭

衛衡字伯梁南鄭人也少師事

隱士同郡樊季齊以高行聞郡九察孝廉公府州十
辟公車三徵不應董扶任安從洛還過見之曰京師
天下之市朝也足下猶之人耳幸其在遠以虛名屢
動徵書若至中國則價盡矣衡笑曰時有儉易道有
汙隆若樊季齊楊仲桓雖應徵聘何益於時乎苟無
所則尼軻栖栖是以君平子真不屈其志豈予之徒

也哉吾何虛假之有安扶服之敬其言也

鄧公方到忠枉原情 鄧公成固人也景帝時御史大夫晁錯患諸侯强大建議減削會吳楚七國謀反假言誅錯故吳相袁盎譖帝殺之拜盎太常使赦七國七國遂叛鄧公為謁者入言軍事問曰七國聞晁錯死罷兵不對曰吳王即山鑄錢煮海為鹽謀反積數十年錯患之故欲削弱為萬世策諸侯憂之計畫始行身死東市諸侯莫憚內杜忠臣之口外為諸侯報

怨臣竊為陛下不取也帝歎息曰吾亦恨之武帝初為九卿

博望致遠西南來庭張騫成固人也為人强大有謀能涉遠為武帝開西域五十三國窮河源南至絕遠之國拜校尉從討匈奴有功遷衛尉封博望侯於是廣漢緣邊之地通西南之塞豐絕遠之貨令帝無求不得無思不服至今方外開通騫之功也

子游師生讒巧所傾張猛字子游騫孫也師事光祿

勲周堪以光祿大夫給事中侍元帝帝當廟祭濟渭
欲御樓船御史大夫薛廣德當車免冠乞頸血汚車
輪陛下不得廟祭矣帝以不悅猛進曰主聖則臣直
今乘船危就橋安聖主不乘危故大夫言之帝曰曉
人不當如是耶後與周堪俱以忠正為幸臣弘恭石
顯所譖毀乍出乍徵堪平和猛卒自殺

王孫養性矯葵厲生 楊王孫成固人也治黃老家累
千金厚自奉養臨終告其子曰我死裸葬以復吾真

但為布囊盛尸入地七尺既下從足脫之以身親土
其子不忍見王孫友人祁侯諫之王孫曰厚葬無益
死者也夫俾財送死今日入明日發此真無異暴骸
中原裹以幣帛隔以棺槨含以珠玉後腐朽乃得歸
土不可故吾欲早就真宅祁侯無以易卒躰葬如其
言

司徒監使術暢思精屢登上司七政是經 李邵字孟
節南鄭人也少明經術為郡侯吏和帝遣使者二人

微行至蜀宿郤候舍郤為出酒夜飲露坐郤問曰君
來時寧知二使何日發來耶二人恠問之郤指星言
曰有二使星入益部後一人為漢中太守命為功曹
察孝遂馳名為尚書郎徙左丞稍遷至尚書僕射尚
書令拜司空又進司徒清公直亮當世稱名順帝世
薨

炎精不頽朱明不揚太尉謬謬任國拔荒濯日暘谷將
外扶桑惡直醜正漢道遂喪李固字子堅郤子也陽

嘉二年以對策忠亢拜議郎大將軍梁商后父也表
為從事中郎授荊州刺史值州部有亂至州先友賢
者南陽鄭叔躬宗孝節零陵支宣雅表薦長沙桂陽
太守趙歷已又奏上江夏南郡太守孔疇高賜等臧
穢州土自然安靜徙太山太守克寧盜賊入為將作
大匠多致海內名士南陽樊英江夏黃瓊廣漢楊厚
會稽賀純光祿周舉侍中杜喬陳留楊倫河南尹存
東平王惲陳國何臨清河房植等皆蒙徵聘轉大司

農順帝崩太后臨朝拜太尉與后弟大將軍梁冀太
傅趙峻並錄尚書沖帝崩時徐揚有盜賊太后欲不
發喪須召諸王至固爭不可言國家多難宜立長君
太后欲專權乃立樂安王為質帝質帝崩太后復與
梁冀謀所立固與司徒南郡胡廣司空蜀郡趙戒書
與冀引周勃霍光立文宣以安漢之策閭鄧廢立之
禍言國統三絕期運厄會興崩之漸在斯一舉宜求
賢王親近不可寢嘿也冀得書召公卿列侯議所立

三公及鴻臚杜喬僉舉清河王蒜冀然之奏御太后
中常侍曹騰私恨蒜說冀明日更議廣戒從冀固與
喬必爭蒜宜立中興才也且年長識義必厚于將軍
冀不聽策免固喬歲餘取下獄以無事出之京師市
邑皆稱千萬歲冀惡其為人所善更奏繫之固書與
二公曰吾欲扶持漢室使之比隆文宣何圖梁將軍
迷謬諸子曲從以吉物為凶成事為敗漢家衰微從
是始矣將軍亦有不利吾雖死上不慙於天下不愧

於人求義得義死復何恨遂自殺二公得書歎息流涕士民咸哀哭之桓帝無道冀尋受誅漢家遂徵政在閹官無不思固也

元修敦重威惠實亮 張則字元修南鄭人也為牂柯太守威著南土永昌越雋夷謀欲反畏則換臨其郡相諫而止號曰卧虎以成狄勲遷護羌校尉徵拜扶風又換臨桂陽皆平盜賊巴郡板楯反拜隆集校尉鎮漢中徙梁州刺史又為魏郡太守所在稱治靈帝

崩後大將軍袁紹表為長史不就丞相曹公拜度遼將軍

子雅溫恭見察文方 趙宣字子雅南鄭人也出自寒微以溫良博雅太守犍為楊文方深器異之遂察孝廉官至犍為太守

二珪琬琰三辰懸望 趙瑤字元珪琰字稚珪凡七兄弟宣子也皆以令德著聞瑤少有公望瑤始為緱氏袁趙二公相與書曰趙瑤在緱氏猛虎歸迹百里均

耳叔平何難遷扶風太守徙蜀郡司空張溫謂之曰
昔第五伯魚徙蜀郡為司空掃吾第以待足下矣瑤
曰諾尋換廣漢卒琰始為青州刺史部下清肅徙梁
相徵拜尚書不就卒

仲卿報友行義以理 陳綱字仲卿成固人也少與同
郡張宗受學南陽以母喪歸宗為安衆劉元所煞綱
免喪徃復之值元醉卧還須醒乃殺之自拘有司會
赦免三府並辟舉茂才拜弘農太守初至有兄弟自

相責引退是後無訟者在官九年卒天子痛惜賜家錢四十萬

伯度玄鏡榮辱屑已 李法字伯度南鄭人也桓帝時為侍中光祿大夫數亢表宦官泰盛椒房泰重史官記事無實錄之才虛相褒述必為後笑帝怒免為庶人恬然以咎失為已責久之徵拜汝南太守遷司隸校尉湛然無自得之容

德公在林懸象垂晷既冲雲清荀張儀准 李燮字德

公太尉固子也父死時二兄亦死變為姊所遣隨父
門生王成亡命徐州傭酒家酒家知非常人以女妻
之延熹二年梁冀誅後月經陽道暈五車史官上書
昔有大星升漢而西捲舌揚芒迫月熒惑犯帝坐則
有大臣枉誅星在西方太尉固應之今暈如之宜有
赦命錄其遺嗣以除此異於是下赦變得返舊四府
並辟公車徵議郎與趙元珪潁川賈偉節荀慈明張
伯慎為友伯慎為潁川太守與慈明文相言論偉節

與焉京師以為臧否伯慎問趙元珪曰德公所言何
元珪曰無言也伯慎追嘆曰當如德公兒輩徒靡沸
耳慈明亦寤而心服拜東平相國王為黃巾所沒得
出天子復封之變以為不可果敗遷京兆尹時人為
之語曰李德公父不欲立帝子不欲立王

伯臺處諫師言亢盡末命防萌妙覩玄揆 陳雅字伯
臺成固人也靈帝時為諫大夫閹官用事上疏曰昔
孝和帝與中常侍鄭眾謀誅大將軍竇憲由是宦官

秉權安帝幼冲和熹太后兄大將軍鄧騭輔政太后
適崩中常侍江京等殺騭安帝登遐黃門孫程又殺
車騎將軍閭顯孝桓帝又與中常侍單超等共誅大
將軍梁冀陛下即祚太傅陳蕃大將軍竇武尚書令
尹勲等欲誅宦官絕其奸擅盡忠王室建萬世策機
事不密為中常侍朱瑀等所殺此即陛下所見今宦
官强盛威傾人主天下鉗口莫敢言者海內怨望妖
孽並作四方兵起萬姓辛苦陛下尚可以安奈後嗣

何帝不省納出為巴郡太守年七十五卒臨終戒其
子曰期運推之天下將大亂雄夫力爭無以貨財為
意吾亡依山薄葬亡歲餘靈帝崩大將軍何進復為
黃門所殺海內果亂終成三國也

孟度邵允 閻憲字孟度成固人也名知人為綿竹令
以禮讓為化民莫敢犯男子杜成夜行得遺物一囊
中有錦二十五疋求其主還之曰縣有明君何敢負
其化童謠歌曰閻尹賦政既明且昶去苛去辟動以

禮讓遷蜀郡吏民泣涕送之以千數

季子英瑋 李歷字季子太尉固從弟也少修文學性
行清白與鄭康成陳元方齊名弱冠拜新城令朝請
都督

計君經筭 程苞字元道南鄭人也光和二年上計吏
時巴郡板楯反軍旅數起征伐頻天子患之訪問益
州計考以方畧苞對言板楯忠勇立功先漢為帝義
民羌入漢中輒蒙其力東征南戰世有功勞由不料

卹以致叛亂非有僭盜能相羣殺兵臨之未必卒得
不如但選明能太守恩信懷服自然安定矣天子從
之卒如其言後在道卒

元靈斐斐 祝龜字元靈南鄭人也年十五遠學汝潁
及太學通博蕩達能屬文太守張府君奇之曰吾見
海內士多矣無如祝龜者也州牧劉焉辟之不得已
行授葭萌長撰漢中者舊傳以著述終

禮高殉名 段崇字禮高南鄭人也太守河間鄭廩命

為主簿永初四年涼州羌反溢入漢中從塵屯褒中
虜東攻塵欲戰崇諫不可願固壘待之塵不聽出戰
敗績崇與門下吏王宗原展及子勅兄子伯生推鋒
死戰衆寡不敵崇等皆死羌遂得塵殺之

伯義死節

程信字伯義南鄭人也時為功曹守居馳

來赴難殞殮塵喪送還鄉里訖乃結故吏冠蓋子弟
二十五人言共報羌各募敢死士以待時太守鄧成
命信為五官元初二年虜復來信等將其同志率先

奮討大破之信被八創死天子咨嗟元初五年下詔
書賜信崇家穀數千斛

四行齊致在茲六子 讚閭憲已下也又有王宗原展
及嚴萼李容姜濟陳已曹廉勾矩劉旌九人皆以令
義為鄭厓所命王宗原展與厓同死萼容等七人與
信共并命詔書既賜崇信家又賜九子家穀各五百
斛給死事復

元侯趙陳益亦烈士 燕邠字元侯趙嵩字伯高南鄭

人也陳調字元化仲卿孫也邠為刺史卻儉從事使
在葭萌與從事董馥張肩同行儉為黃巾賊王饒趙
播等所殺邠聞故哀慟說馥肩赴難二子不可邠歎
曰使君已死用生何為獨死之牧劉焉嘉之為圖象
學官誅馥等嵩事太守蘇固固為米賊張脩所疾殺
嵩痛之杖劍直入脩營殺十餘人幾獲脩死陳調少
尚遊俠聞固死聚賓客百餘人攻脩大破之進攻脩
營乃與戰以傷死

渙渙龍宗振振麟趾文炳彬蔚漢之表軌 摠讚此三十五人也

述漢中人士 其陳術字申伯作者舊傳者也失其行事歷新城魏興上庸三郡太守及錫光等不列也

穆姜溫仁化繼為親 穆姜安衆令程祗妻司隸校尉李法姊也祗前妻有四子興敦覲豫穆姜生二子淮基祗亡興等憎惡姜姜視之愈厚其資給六子以長幼為差衣服飲食凡百如之久興等感寤自知失子

道詣南鄭獄受不愛親罪太守嘉之復除門戶常以
二月八月社致肉三十斤酒米各二斛六斛六子相
化皆作令士五人州郡察舉基字稚業特雋逸為南
郡太守

泰瑛嚴明世範厥訓 泰瑛南鄭楊拒妻大鴻臚劉巨
公女也有四男二女拒亡教訓六子動有法矩長子
元珍出行醉母十日不見之曰我在汝尚如此我亡
何以帥羣弟子元珍叩頭謝過次子仲珍白母請客

既至無賢者毋怒責之仲珍乃革行交友賢人兄弟
為名士泰瑛之教流於三世四子才官隆於先人故
時人為語曰三苗止四珍復起

杜氏之教父母是遵 杜泰姬南鄭人趙宣妻也生七
男七女若元珪稚珪有望五人皆令德其教男也曰
中人情性可上下也在其檢耳若放而不檢則入惡
也昔西門豹佩韋以自寬宓子賤帶弦以自急故能
改身之恒為天下名士戒諸女及婦曰吾之倅身在

乎正順及其生也恩存於撫愛其長之也威儀以先
後之體貌以左右之恭敬以監臨之懃恪以勸之孝
順以內之忠信以發之是以皆成而無不善汝曹庶
幾勿忘吾法也後七子皆辟命察舉牧州守郡而漢
中太守南鄭令多與七子同歲季考上計無不修敬
泰姬執子孫禮

禮珪肅穆言存典韻 禮珪成固陳省妻也楊元珍之
女生二男長娶張度遼女惠英少娶荀氏皆貴家豪

富從婢七八資財自富禮珪勅二婦曰吾先姑母師也常言聖賢必勞民者使之思善不勞則逸逸則不才吾家不為貧也所以粗食急務者使知苦難備獨居時二婦再拜奉教從孫奉上微慢珪抑絕之感悟革行遭亂流行宗表欲見之必自嚴飭從子孫侍婢乃引見之曰此先姑法也四時祭禮自親養牲釀酒曰夫祭禮之尊也年八十九卒惠英亦有淑訓母師之行者也

文姬叔敏宗祀獲歆

文姬南鄭趙伯英妻太尉李固

女也父為梁冀所免兄憲公季公罷官歸文姬歎曰
李氏滅矣乃與二兄議匿弟變父門生王成亡命徐
州涕泣送之謂成曰託君以六尺之孤若李氏得嗣
君之名義參於程杵矣久之遇赦變得還行喪服闋
勅之曰先公為漢忠臣雖死之日猶生之年梁冀以
族弟幸濟豈非天乎慎勿有一言加梁氏加梁氏則
連主上是又掇禍也奉行之後成在徐州各異處

傭賃而私相往來成病亡變四時祭之

陳氏二謙或智或仁 陳順謙成固人也順謙適鄧令

曹寧十九寡居長育遺孤八十餘卒兄子陳規著書

歎述之惠謙適張亮則在扶風官下吏白欲重禁嚴

防以肅非元脩訪於惠謙惠謙曰恢弘德教養廉免

恥五刑三千益亦多矣又何加也兄子伯思學仙道

惠謙戒之曰君子疾沒世名不稱不患年不長也且

夫神仙愚惑如繫風捕影非可得也伯思乃止陳伯

臺稱云女尚書之後耳

禮脩順姑恩愛溫潤 禮脩趙嵩妻張氏女也姑酷惡
無道遇之不以禮脩終無愠色及寧父母父母問之
但引咎不道姑卒感寤更慈愛之鄉人相訓曰作婦
不當如趙伯高婦乎使惡姑知變可謂婦師矣後姑
病女來省疾姑却之曰我死固當絕於賢婦手中後
遭米賊嵩死乃碧塗面亂首懷刀託言病賊不逼也
養遺生女依父叔立義終身者也

樹南悼夫輕死重信 韓樹南南鄭人趙子賤妻也子賤初為郡功曹李固之誅詔書下郡殺固二子憲公季公太守知其枉遇之甚寬二子託服藥死具棺器欲因出逃子賤畏法勅更驗實就煞之及固小子變得還子賤慮變報仇賃人刺之變覺告郡煞子賤初樹南諫子賤子賤不從及臨死許共并命兄弟婢侍婢視守之經百餘日乃怠白兄婢念一死萬不得生不敢復圖死也上下以為信然無幾時於幕下自煞

祁祁令姬如玉如金允矣淑媛齊德姜任
摠讚此九人也

述漢中列女

右漢中士女讚第五

凡四十四人

三十五人
士九人女

梓潼人士

鎮遠敦壯立勲南瀕 文瀕字子奇梓潼人也孝平帝
末以城門校尉為犍為屬國遷益州太守造開稻田

民咸賴之公孫述時拒郡不服述拘其妻子許以公
侯招之不應乃遣使由交趾貢獻河北述平世祖嘉
之徵拜鎮遠將軍封成義侯南中咸為立祠子忱有
令德為北海太守

巨遊玉碎高風金振

李業字巨遊梓潼人也少執志

清白太守劉咸慕其名召為功曹不詣咸怒欲煞之
業徑入獄咸釋之公孫述累聘不應述怒遣鴻臚尹
融持毒藥酒逼之業笑曰名不可毀身可殺不可辱

也遂飲藥死述恥殺善士賜錢百萬子翬逃匿不受
建武中察孝廉為遂久令

文堅亟哉南面懷民 景毅字文堅梓潼人也太守丁
羽察舉孝廉司徒舉治劇為沅陽侯相高陵令立文
學以禮讓化民遷太守上封吏民守闕請之三年不絕
以子顧師事少府李膺膺誅自免久之拜成都令遷
益州太守上封吏民涕泣送之至沮者七百人白水
縣者三百人值益州亂後米斛千錢毅至恩化暢洽

比去米斛八錢鳩鳥巢其廳事孕育而去三府表薦徵拜議郎自免歸州牧劉焉表拜都尉為人廉正疾淫祠勅子孫惟修善為禱仁義為福年八十一而卒盛國好學研蹟聖真 楊充字盛國梓潼人也少好學求師遂業受古學於扶風馬季長呂叔公南陽朱明叔潁川白仲職精究七經其朋友則潁川荀慈明李元禮京兆羅叔景漢陽孫子夏山陽王叔茂皆海內名士還以教授州里常言圖緯空說去事希略疑

非聖不以為教察孝廉為郎卒

漢伯肆業諸生之純

景鸞字漢伯梓潼人也少與廣

漢郝伯宗蜀郡任叔本潁川李仲勃海孟元叔遊學

七州遂明經術還乃撰禮略河洛交集風角雜書月

令章句凡五十萬言太守

闕

貺命為功曹察孝廉舉

有道博士徵不詣然上陳時政言經得失又戒子孫

人紀之禮及遺令期死葬不設衣衾務在節儉甚有

法度卒終布衣

伯僖効志 張壽字伯僖涪人也少給縣丞楊放為佐
放為梁賊所得壽求之積六年始知其生存乃賣家
鹽并得三十萬市馬五疋往贖放道為羌所刼掠盡
凡往三年計道遠不可得數乃單身詣虜涕泣自說
虜哀其屢求遣放還鄉郡召為中候詔書除巫尉以
身佩印盡讓所有財物與三弟復為郡掾章平賦役
歲出三百五十萬遷功曹史徙五官掾卒

李餘殘身 李餘涪人父早世兄夷殺人亡命母慎當

死餘年十三問人曰兄弟相代能免母不人曰趣得
一人耳餘乃詣吏乞代母死吏以餘年小不許餘因
自死吏以白令令哀傷言郡郡上尚書天子與以財

葬圖畫府廷

童人李餘浩人可考
於先漢士女目篇

寇王二子行勇以仁 寇祺字宰朝梓潼人也與邑子
侯蔓俱學涼州蔓後為勃海王象所殺祺杖劍至象
家值象病象謝曰君子不掩人無備安有為友報
讎殺病人也祺乃還久之復往殺象由是察孝廉為

灞陵令濟陰相王晏字叔博涪人也與廣漢張昌寧
叔受業大學昌為河南呂條所殺晏叔殺條事在叔
解

李助多方以茲立稱 助字翁君涪人也通名方校醫
術作經方頌說名齊郭玉自此以上

原闕

章武之興亦迪才倫德賢好古澹心藝文 李仁字德
賢涪人也益部多貴今文而不崇章句仁知其不博

乃游學荊州從司馬德操宋仲子受古學以修文自終也

國輔皓然形動神沉 杜微字國輔涪人也任安弟子
先主定蜀常稱輦闔門不出建興二年丞相亮領州
牧選為主簿輿而致之亮引見與書誘勸欲使以德
輔時微固辭疾篤亮表拜諫大夫從其所志

思潛遊學休志素林 尹默字思潛涪人也少與李仁
俱受學司馬微宋忠等博通五經專精左氏春秋自

劉歆條例鄭衆賈逵父子陳元方服虔注說略皆誦述希復案本以左傳授後主後主立拜諫議大夫丞相軍祭酒子宗亦為博士耳

欽仲朗博訓詁典墳 李譔字欽仲仁子也少受父業又講問尹默自五經四部百家諸子伎藝算計卜數醫術弓弩機械之巧皆致思焉為太子中庶子右中郎將著古文周易尚書毛詩三禮左氏注解太玄指依則賈馬異於鄭玄與王肅初不相見而意歸多同

孫德果銳作劉幹臣

李福字孫德涪人也先主初為

成都令建興九年遷巴西太守後為江州都督揚武
將軍入為尚書僕射封平陽亭侯延熙初為前監軍
司馬福同郡梓潼文恭仲寶亦以才幹為牧亮治中
從事丞相叅軍

衍衍偉彥玉潤蘭芬邵名表器江漢之俊 總讚此十
五人也

述梓潼人士

季姜雍穆化播二婦王氏世興實由賢母 季姜梓潼文

氏女將作大匠廣漢王敬伯夫人也少讀詩禮敬伯
前夫人有子博女紀流二人季姜生康稚芝女始示
凡前後八子撫育恩愛親繼若一堂祖母性嚴子孫
雖見官二千石猶杖之婦跪受罰於堂歷五郡祖母
隨之官後以年老不願遠鄉里姜亦常侍養左右紀
流出適分已侍婢給之博好寫書姜手為作袞於是
內門相化動行推讓博妻捷為楊進及博子遵婦蜀

郡張叔紀服姑之教皆有賢訓號之三母堂亡姜勅
康稚芝婦事楊進如舅姑中外則之皆成令德季姜
年八十一卒四男棄官行服四女亦從官舍交赴內
外冠冕百有餘人當時榮之王氏遂世興

杜慈專專父不諒只 涪杜季女者巴郡虞顯妻也十
八適顯顯亡無子季欲改嫁與同縣楊上慈曰受命
虞氏虞氏早亡妾之不幸當生事賢姑死就養成室
存亡等但欲在終供養亡不有恨願不易圖季知不

可告而奪也乃密謀與強逼迫之慈縊而死

敬楊雪讎壯踰烈士 敬楊涪郭孟妻楊文之女也始

生失母八歲父為關盛所殺無宗親依外祖鄭行年

十七適孟孟與盛有舊盛數往來孟家敬楊涕泣謂

孟曰盛凶惡薄命為女無男昆惡讎未報未嘗一日

忘也雖婦人拘制然父子恩深恐卒狂惑益君禍患

君宜疎之孟以告盛盛不納安漢元年盛至孟家敬

楊以大杖打殺盛將自殺孟止之與俱逃涪令雙勝

出追聞其故而止安尉二門會赦得免中平四年涪
令向遵為立圖表之

惟茲三媛仁暢義理邦有斯嬪以馳遐紀 摠讚三人也
述梓潼列女

右梓潼郡士女讚第六

凡十八人 十五人
士三人女

譔曰二州人士自漢及魏二百四十八人而已 一百九
十七人

士五十
一人女 後賢二十人合二百六十八人以示來世之君

子焉如其遺脫及後世可書者願貽後雋又春秋穀梁傳首叙曰成帝時議立三傳博士巴郡骨君安獨駁左傳不祖聖人後漢時魏郡太守王牧薦尹方為三公天子詔尚書郎蜀郡張俊策之然不詳其行事


譔曰二州人士自漢及魏可謂衆矣何者世宗多士則相如麟遊伯司鳳翔洛下雲翳叔文龍驤在孝宣則王褒蔚炳中和作詠屬文甘泉葩為世鏡在元成則君公蹇蹇心思國病慮經劉危直忤王聽其高者則嚴君味

道易俗移風仲元端委居為人宗若夫秉心塞淵與物
盈冲則揚子雲也名重泰山華夏仰崇則鄭子真也不
屈其身志高青雲則譙玄也不恥惡君混道推運則楊
宣也降及建武明章以來出者則能內貫朝揆外播五
教贊和鼎味經綸治要上答太階下允民照處者則利
居盤桓皓然玄蹈天爵翫之人爵則笑懸車門肆夷惠
齊紹若斯之倫海內服其英名洙泗方其渙耀矣故曰
漢徵八士蜀出其四又曰漢具四義蜀選其二可謂不

衆乎然巴郡骨君安以儒學典雅稱於孝成蜀郡張俊
策問尹方不出五經常議捷為呂孟有託孤之節若茲
之類郡邑徃徃垂象刊銘見有苗裔璩晚生長亂故老
以沒莫所咨質不詳其事但依漢書國志陳君所載凡
士女二百四十八人而已後賢二十人合二百六十八
人以示來世之好事者如能詳其遺脫及有可書願附
於左

其傳志父祖子孫及有名失事失官位者不列寧州

人士亦不列別為目錄至晉元康末凡三百九十二人也



華陽國志卷十下